

每週經課朗誦經文(巴克禮台語漢字)2014/05/11

共同經課 - 1

使徒行傳二章四十二節~四十七節

42 常常專務使徒的教示，相及交陪，擘餅，祈禱。43 眾人攏驚惶；使徒閣行多多奇事神蹟。44 信的人攏聚集佇一所在，所有的物公家用，45 閣賣物產、家業，照逐人所欠用分互in。46 日日同心專務佇殿內，也佇人家擘餅，用歡喜、誠實的心來食，47 謳佬上帝，亦得著眾百姓歡喜in。主將得救的人日日加添互in。

共同經課 - 2

詩篇二十三篇

1 [大衛的詩。] 耶和華是我的牧者，我無欠缺。2 伊互我倒佇青翠的草埔，導我佇安靜的水邊。3 伊互我的靈魂精英，為著伊的名導我行義的路。4 我雖然行過死蔭的山谷，亦毋驚災害，因為你及我佇啲；你的槌，你的枋，安慰我。5 佇我對敵的面前，你給我排設筵席；你用油抹我的頭殼，我的杯滿出來。6 恩典及慈悲的確隨我到一世人；我欲永遠倚起佇耶和華的厝。

共同經課 - 3

彼得前書二章十九節~二十五節

19 因為人受冤枉，若是為著天良向上帝來擔憂，這是通謳佬。20 因為恁若犯罪受拍來忍受，有甚麼可取？恁若行好受苦來忍受，這佇上帝的面前是通謳佬。21 因為恁受召本是欲按呢；因為基督也替恁受苦，留模樣互恁，欲互恁隨伊的腳步。22 伊無犯罪，嘴內無詭譎。23 互人罵無倒罵人；受苦無放刁，獨獨將本身交託彼個照公義審判者。24 伊佇柴裡，親身擔當咱的罪佇伊的身軀，互咱向罪彼面死的人會向義此面來活。對伊的傷痕，恁得著醫好。25 因為恁前親像羊迷路，若是今歸佇恁靈魂的牧者，也是監督。

共同經課 - 4

約翰福音十章一節~十節

1 「我實實給恁講，入羊櫟(tiâu)，無對彼個門，來對別所在搬(pōaⁿ)過的，是賊，是強盜。2 對門入的，是羊的牧者。3 顧門的給伊開；羊聽伊的聲。就隨名叫家己的羊，導in出。4 已經將家己的羊攏放伊出去，就做頭行，羊亦隨伊，因為認得伊的聲。5 決斷無隨生份人；就是閃避伊，因為袂認得生份人的聲。」6 耶穌用此個譬喻給in講，in毋知伊所給in講的是甚麼。7 所以，耶穌閣給in講：「我實實給恁講，我就是羊櫟(tiâu)的門。8 見若代先我來的是賊，是強盜；若是羊無聽in。9 我就是門；若有對我入的，欲得著救，閣欲出入亦欲得著草料。10 賊來，無毋是愛偷，愛剗，愛滅無；我來，是欲互in有活，閣有豐盛。」